

皇
清
經
解

金

清

經

解

皇清經解卷三百一十三

學海堂

春秋左傳注疏考證

天台齊侍郎

召南

著

卷三十一

會吳于柎注柎楚地○按此時楚地恐尙不及淮北若果係楚地晉宋諸國安得會吳於此乎杜云楚地由後邈前之稱也後漢郡國志彭城國傅陽有柎水卽此柎也前志楚國傅陽故偃陽國是柎卽近偃陽之地旣會于柎卽滅偃陽耳傅陽故縣今在嶧縣南柎卽嶧縣泖口也

傳魯有禘樂賓祭用之疏禘是禮之大者羣公不得與同而於賓得同禘者賓者敬鄰國之賓故得用大祭之樂也○按賓者二字應是衍文

傳生秦丕茲○按丕茲卽秦商也史記孔子弟子傳秦商字子丕鄭康成曰子丕楚人家語七十二弟子解曰秦商魯人字不慈家語是也不不字通茲字訛慈耳鄭以爲楚人非也

傳臨於周廟禮也疏魯衛有大功德王命立之是其正也○按諸侯不得祖天子自是正禮魯之有周廟乃後人僭立託言王命所賜耳不得謂之正也劉敞曰魯君僭而立周廟三家僭而立公廟左氏不知遂真謂禮豈不誤哉凡諸侯之喪異姓臨於外同姓於祖廟同宗於禰廟於義足矣此論甚確

卷三十二

傳晉國以平數世賴之○按傳侈言讓善之效耳自偃衰推讓而霸業以興自處父改蒐而禍連數世此復有相讓之事故可

稱耳不然明年伐秦卽已將佐不睦遷延無功況數世賴之乎
傳姜戎氏注四嶽之後皆姓姜又別爲允姓○按戎種不一姜
戎是四嶽姜姓之裔故曰姜戎陰戎是允姓之後以其同惡故
並徙之瓜州晉惠公並誘以來耳非姜戎又別爲允姓也杜注
似非又瓜州地在今燉煌按漢書地理志敦煌杜林以爲古瓜
州地生美瓜顏師古注曰卽左傳所云允姓之戎居於瓜州者
也其地今猶出大瓜

傳於是知朔生盈而死注朔知嚳之長子盈朔弟也○按史記
索隱引系本云莊子首生武子嚳嚳生莊子朔朔生悼子盈盈
生文子躁躁生宣子申申生知伯瑤據此則朔爲嚳子盈爲朔
子朔早卒未及爲卿於傳文爲甚順但其祖首旣謚莊朔又謚

莊則誤耳不知杜注何以必指盈爲朔弟也

傳瞽爲詩疏瞽陳曲○按曲字今本國語作典非也以是疏瞽陳曲證之則曲字是但古人言詩歌不言曲言曲蓋始於此詩譜亦作曲

傳故夏書曰適人以木鐸徇於路注適人行人之官也○按杜不見古文疑適人徇路類於輶車之采風故注爲行人之官也傳王室之不壞繫伯舅是賴疏上文不言桓公不得爲賴桓公也○按上既有世胄大師之文則此句正言桓公匡正之功耳疏未確

卷三十三

公會晉侯宋公衛侯鄭伯曹伯莒子邾子薛伯杞伯小邾子于

淩梁戊寅大夫盟○按杜注以諸大夫本欲盟高厚高厚逃歸故遂自共盟雞澤會重序諸侯今此間無異事卽上諸侯大夫可知非也公羊穀梁並謂政在大夫

齊侯伐我北鄙圍桃注弁縣東南有桃虛○按弁縣卽卞縣也卞弁古通用後漢郡國志魯國卞縣注卽引此注

傳晉人執衛行人注長子純留二縣今皆屬上黨郡○按漢書地理志上黨郡長子師古注曰讀如長短之長屯留師古注曰屯音純晉志亦作屯留唯此作純

傳右回梅山○按注在滎陽密縣東北後漢郡國志河南尹密縣有梅山注引此注作在縣西北未知孰是又魚陵魚齒山注在南陽犍縣北而郡國志潁川郡襄城有汾邱有魚齒山注引

皇清經義 卷三十四
此注蓋犇縣與襄城連界也

卷三十四

公至自伐齊○按賈逵謂圍齊而致伐以策伐勳也於義爲得孔疏辨之未當魯於是役倚晉成功至作林鐘以銘勳其以伐告廟又何疑焉劉敞曰圍而以伐致者以伐告也義甚明確

傳齊侯娶于魯曰顏懿姬注顏懿皆二姬母姓○按姬卽姓顏當是其氏族耳注謂皆二姬母姓不知何所本也又仲子戎子注云皆宋女按晉獻公小戎子生夷吾則戎有姓子者不必宋女稱子也

傳得罪於王之守臣注范宣子爲王所命故曰守臣○按杜所以言范宣子者以管仲語天子之二守國高在明見於傳文也

宣子之祖士會王以黻冕命將中軍義同國高

卷三十五

傳鄭人使少正公孫僑對曰注少正鄭卿官也○按鄭有六卿其司徒司馬司空皆見於傳有太宰官而非卿石彘是也少正爲卿官尋傳上下惟見此文是時子產之位任四其上爲子展子西伯有見二十六年傳

傳貳於楚者子侯石孟歸而討之注石孟石彘○按石彘與良霄以十一年如楚爲楚所執傳在會蕭魚之前至十三年冬楚人始歸良霄于鄭石彘之計也此傳言歸而討之似蕭魚會後鄭卽朝晉十二年春歸國卽討子侯石孟石孟似又是一人非石彘也必以石彘實石孟則所謂子侯者又何人乎

傳知悼子少而聽於中行氏注悼子知罃之子荀盈也○按史記索隱引系本云林父生庚庚生偃偃生吳又曰首生罃罃生朔朔生盈並是四代則知盈與中行吳是再從兄弟也

傳趙勝帥東陽之師以追之疏服虔以東陽爲魯邑繆之甚矣東陽之師謂下文叔孫豹所帥者也○按孔疏旣知服虔以魯東陽解晉東陽之非又云東陽之師謂下文叔孫豹所帥是仍以魯師解晉師矣傳下文明曰叔孫豹帥師救晉次于雍榆與趙勝所帥東陽之師並無干涉疏文自相矛盾又何以糾服虔之失也尋按文勢必係從來刊本之誤疑疏元文當云服虔以東陽爲魯邑東陽之師謂下文叔孫豹所帥者謬之甚矣

傳臧賈臧爲出在鑄○按十七年傳高厚圍臧紇於防邶叔紇

臧疇臧賈帥甲三百宵犯齊師送之而復是賈於紇爲卿之後亦嘗還魯矣紇奔邾時賈又在鑄耳

傳自虞以上爲陶唐氏○按唐書宰相世系表劉氏出自祁姓劉累事夏爲御龍氏在商爲豕韋氏在周封爲杜伯至宣王滅其國其子隰叔奔晉爲士師生士薦爲生成伯缺缺生士會

卷三十六

傳侍人賈舉注重言侍人者別下賈舉○按下賈舉與州綽等同及於難齊勇士也故此加侍人以別之凡史文於姓名相同之人必用辨別史記韓信及韓王信是也

卷三十七

公會晉人鄭良霄宋人曹人于澶淵○按監本晉人訛晉侯別

本亦然按傳明曰趙武不書尊公也不書者貶之稱人使與宋向戌及曹人一例也孔疏甚明今改正

傳吾所能御也○按此御字音義云魚呂反則卽禦字故杜注訓爲止

傳享子展賜之先路三命之服注蓋請之於王○按趙汭曰晉命士會傳言請於王此不言請於王則鄭伯自賜之可知杜說非也按杜所以言請於王者以此傳先路次路與王賜叔孫豹大路賜鄭子蟠大路以葬二文同耳豈知路車冕服本隨命數春秋諸侯僭妄固有不請命而賜其臣者乎魯賞晉諸帥以三命再命之服襄公賞公冶以冕服晉悼賞魏絳以金石之樂衛賞新築人以曲縣繁纓豈皆一一請之於王趙氏糾杜之違是

也

傳囚曰頡遇王子弱焉○按楚既僭號稱王則其子不必僭稱王子惟與列國會盟王子仍稱公子經傳所書楚公子某是也其在本國臣民自皆稱爲王子此傳是以前言公子圍後言王子圍

卷三十八

豹及諸侯之大夫盟于宋○按豹不書族自是蒙上文會盟祇同一地也左氏以爲違命穀梁以爲恭褻貶不同要皆過當

傳故不書其族言違命也○按豹以違命去族此左氏之曲說也賈逵服虔稱豹執義尊國自是正論孔疏謂杜善解左氏可也卽謂賈服皆背左氏亦可也若謂賈服異孔子之經豈其然

乎按劉敞曰蔡沈失位左氏貶之今魯欲自同人之私失位甚矣大夫出境有可以重社稷者猶曰專之今令出季氏而謂不可違非也此論甚明

傳崔宗邑也○按唐書宰相表曰崔氏出自姜姓齊丁公伋嫡子季子讓國叔乙食采於崔遂爲崔氏可爲宗邑之證

傳十一月乙亥朔日有食之注文十一年三月甲子至今年七十一歲○按文十一年爲乙巳歲此襄二十七年乙卯歲也文十一年傳稱正月甲子而杜改作三月者一從夏正一據周歷也

傳公膳日雙雞○按公膳二字連讀卿大夫在朝之公膳猶六朝客食唐代堂餐也昭四年傳注曰食肉之祿謂在朝廷治其

職事就官食者疏曰在官治事官皆給食大夫以上食乃有肉又引此傳以證之是也

卷三十九

春王正月公在楚○按事勢有漸書襄公在楚卽昭公在乾侯之漸也昭公之辱始於襄公而意如之惡又甚于宿

傳遂使印段如周○按魯君至親祫楚喪而於王室不遣卿大夫名義尙可問乎傳記印段如周見鄭之卑衰周於晉楚也又見魯之但知有晉楚并不知有周也

傳其周德之衰乎猶有先王之遺民焉注謂有殷王餘俗故未大衰○按文義當云謂有殷王餘俗故未大吳世家引此注作故未大是也各本俱衍一衰字

傳見舞象箛南籥者○按下文韶箛箛音簫疑此箛亦應同之
注雖無明文但云舞所執則簫亦可執也陸氏於此音朔與下
不同必有所據今不可考又吳世家注引賈逵曰象文王之樂
舞象也箛舞曲也南籥以籥舞也○又疏詩云維清奏象舞○
按詩云應作詩序此引序不引詩也

傳若有他樂吾不敢請已○按吳世家注引服虔曰周用六代
之樂堯曰咸池黃帝曰雲門魯受四代下周二等故不舞其二
季札知之故曰雖有他樂吾不敢請杜注蓋用其說也

卷四十

傳高其閑閼音義爾雅云衙門謂之閑○按郭璞注爾雅引此
傳曰閑長杙卽門闕也與杜注異

傳延州來季子其果立乎疏季子讓王位升延陵爲大夫○按
升延陵爲大夫文義不順疑當作居延陵爲大夫○又疏但不
知何以呼爲延陵耳○按吳世家曰季札封於延陵故號曰延
陵季子其說曉然又按漢書地理志會稽郡毗陵季札所居顏
師古注曰舊延陵漢改之又沛郡下蔡故州來國爲楚所滅後
吳取之至夫差遷蔡昭侯於此然則夫差以前爲季札食邑矣

卷四十一

傳夏有觀扈○按漢書地理志右扶風鄠有扈谷亭扈夏啓所
伐又東郡畔觀注應劭曰夏有觀扈後漢郡國志衛本觀故國
姚姓

傳商有姚姒○按竹書紀年商外壬元年姚人邳人叛當卽此